

**RREGULLORE PËR INTEGRITETIN DHE TRANSPARENCËN
E
TREGUT ME SHUMICË TË ENERGJISË**

Tiranë

2020

Përmbajtja

KREU I DISPOZITA TË PËRGJITHSHME.....	3
Neni 1 Qëllimi dhe Fushëveprimi.....	3
Neni 2 Përkufizime	3
KREU II NDALIMI I TREGTIMIT DHE DETYRIMI PËR PUBLIKIM TË TË DHËNAVE	8
Neni 3 Ndalimi i tregtimit nga personat e brendshëm.....	8
Neni 4 Detyrimi për të publikuar informacionin e brendshëm	9
Neni 5 Ndalimi i Manipulimit të Tregut.....	10
KREU III MONITORIMI DHE REGJISTRIMI I PJESËMARRËSVE NË TREG	11
Neni 6 Monitorimi i tregut.....	11
Neni 7 Regjistrimi i pjesëmarrësve të tregut.....	11
KREU IV INFORMACIONET KONFIDENCIALE	12
Neni 8 Mbrojtja e të dhënave	12
Neni 9 Besueshmëria Operacionale	12
Neni 10 Detyrimet e personave që profesionalisht rregullojnë transaksionet	13
Neni 11 Bashkëpunimi në nivel të Komunitetit të Energjisë dhe në nivel kombëtar.....	13
Neni 12 Sekreti profesional.....	14
KREU V MONITORIMI, HETIMI ADMINISTRATIV DHE MASAT ADMINISTRATIVE.....	15
Neni 13 Zbatimi i ndalimeve ndaj abuzimit të tregut	15
Neni 14 Afatet për marrjen e vendimit dhe publikimi i tij	16
Neni 15 E drejta e ankesës.....	16
Neni 16 Masat administrative dhe Gjobat.....	16
KREU VI DISPOZITAT PËRFUNDIMTARE	18
Neni 17 Ndryshimet.....	18
Neni 18 Interpretimi.....	18
Neni 19 Hyrja në fuqi	18

KREU I

DISPOZITA TË PËRGJITHSHME

Neni 1

Qëllimi dhe Fushëveprimi

- 1 Rregullorja për integritetin dhe transparencën e tregut të energjisë me shumicë (REMIT) përcakton kriteret që ndalojnë praktikën abuzive që mund të ndodhin dhe të ndikojnë në tregjet me shumicë të energjisë. Ne të njeten kohe rregullorja ndihmon në funksionimin e duhur të këtyre tregjeve, duke marrë parasysh karakteristikat e tyre specifike.
2. Rregullorja, parashikon monitorimin e tregjeve me shumicë të energjisë nga Enti Rregullator i Energjisë.
3. Rregullorja zbatohet për tregtimin me shumicë të produkteve të energjisë.
4. Rregullorja nuk cenon aplikimin e legjislacionit të Komunitetit të Energjisë dhe legjislacionit kombëtar të ligjor me konkurrencën në tregun e energjisë.
5. ERE dhe, aty ku është e nevojshme, autoriteti kombëtar i konkurrencës dhe autoritetet tjera relevante kombëtare, bashkëpunojnë për të siguruar një qasje të koordinuar për zbatimin e këtyre rregullave, ku veprimet ndërliken për një ose më shumë produkte me shumicë të energjisë, në të cilat zbatohen Nenet 3, 4 dhe 5 të kësaj Rregullore.
6. ERE duhet të bashkëpunojë me organet kompetente gjyqësore, dhe organet tjera në çështjet që kanë të bëjnë me sjelljet që ndikojnë në integritetin e tregut me shumicë të energjisë në territorin e Republikës së Shqipërisë.

Neni 2

Përkufizime

- 1 Termat e përdorura në këtë rregullore kanë kuptimet e përcaktuara më poshtë:
 - 1.1. **Informacion i brendshëm** - do të thotë informacioni i një natyre të tillë që nuk është bërë publik, i cili lidhet direkt ose indirekt me një ose më shumë produkte të energjisë me shumicë dhe që, nëse bëhet publik mund të ndikojë ndjeshëm në çmimet e atyre produkteve.
 - 1.2. Për qëllimet e këtij përkufizimi, **informacion** do të thotë:
 - 1.2.1. informacioni që kërkohet të bëhet publik në përputhje me Ligjin 43/2015 për Sektorin e Energjisë Elektrike, i ndryshuar, Ligjin 102/2015 për Sektorin e Gazit Natyror i ndryshuar, si dhe Ligjin Nr. 119/2014 Për të drejtën e informimit, duke përfshirë dhe legjislacionin sekondar të miratuar në përputhje me këto ligje;

- 1.2.2. informacioni në lidhje me kapacitetin dhe përdorimin e impianteve për prodhimin, ruajtjen, konsumin ose transmetimin e energjisë elektrike ose të gazit natyror ose lidhur me kapacitetin dhe përdorimin e impianteve të GNL-së (Gaz natyror i lëngshëm), përfshirë mungesën e disponueshmërisë së planifikuar ose të paplanifikuar të këtyre objekteve;
- 1.2.3. informacioni që kërkohet të zbulohet në përputhje me dispozitat ligjore ose rregullores në Komunitetin e Energjisë ose rregulloreve në nivel kombëtar, rregullat e tregut dhe kontratat ose parimet në tregun përkatës me shumicë të energjisë, përderisa ky informacion vlerësohet se mund të ketë një efekt mbi çmimet e produkteve të energjisë me shumicë;
- 1.2.4. informacione të tjera që një pjesëmarrës tregu do të mund të përdorte si pjesë e bazës së vendimit të tij për të hyrë në një transaksion, ose për të lëshuar një urdhër për të tregtuar një produkt me shumicë të energjisë;
- 1.2.5. Informacioni do të konsiderohet të jetë i një natyre të saktë nëse tregon një sërë rrethanash që ekzistojnë ose mund të pritët të shfaqen në mënyrë të arsyeshme, ose një ngjarje që ka ndodhur apo mund të pritët të ndodh, dhe nëse është mjaft e specifikuar për të mundësuar nxjerrjen e një konkluzioni lidhur me efektin e mundshëm të atyre rrethanave ose ngjarjeve mbi çmimet e produkteve me shumicë të energjisë;

1.3. Manipulimi i tregut - do të thotë:

- 1.3.1. hyrja në ndonjë transaksion ose lëshimi i ndonjë urdhri për tregtimin e produkteve me shumicë të energjisë, i cili:
- i. jep ose ka të ngjarë të japë sinjale të rreme ose mashtruese në lidhje me furnizimin, kërkesën ose çmimin e produkteve me shumicë të energjisë;
 - ii. siguron ose përpiqet të sigurojë, nga një person ose persona që veprojnë në bashkëpunim, çmimin e një ose disa produkteve me shumicë të energjisë në një nivel artificial, përveç nëse personi i cili ka hyrë në transaksion ose ka lëshuar urdhrin për tregti ka arsye të ligjshme për ta bërë këtë dhe se ky transaksion ose urdhër për tregti përputhet me praktikën e pranuar të tregut, në tregun me shumicë të energjisë; ose
 - iii. përdor ose tenton të përdorë një mjet fiktiv ose ndonjë formë tjetër të mashtrimit apo kontradiktës që jep, ose mund të japë sinjale të rreme apo mashtruese në lidhje me furnizimin, kërkesën ose çmimin e produkteve me shumicë të energjisë;
- 1.3.2. ose shpërndarjen e informacionit përmes mediave, duke përfshirë internetin ose me çfarëdo mjeti tjetër, i cili jep, ose ka të ngjarë të japë sinjale të rreme ose çorientuese në lidhje me furnizimin, kërkesën ose çmimin e produkteve me shumicë të energjisë, duke përfshirë shpërndarjen e lajmeve të rreme ose mashtruese, ku personi që e ka

shpërndarë e dinte, ose duhet ta kishte ditur, se informacioni ishte i rremë apo mashtrues.

1.4. Kur informacioni shpërndahet për mediat ose produkte artistike, shpërndarja e informacionit do të vlerësohet duke marrë parasysh rregullat që rregullojnë lirinë e shtypit dhe lirinë e shprehjes në media, përveç nëse:

1.4.1. ata persona kanë, drejtpërdrejt ose tërthorazi, avantazh ose perfitime nga shpërndarja e informacionit në fjalë; ose

1.4.2. zbulimi ose shpërndarja bëhet me qëllim të çrregullimit të tregut në lidhje me furnizimin, kërkesën ose çmimin e produkteve me shumicë të energjisë;

1.5. **Përpyjekje për të manipuluar tregun** - do të thotë:

1.5.1. hyrja në ndonjë transaksion, duke lëshuar ndonjë urdhër për të tregtuar ose ndërmarrë ndonjë veprim tjetër në lidhje me një produkt energjie me shumicë me qëllimet e mëposhtme:

i. dhënia e sinjaleve false ose mashtruese në lidhje me furnizimin, kërkesën ose çmimin e produkteve të energjisë me shumicë;

ii. sigurimin e çmimit të një ose disa produkteve të energjisë me shumicë në një nivel artificial, përveç nëse personi që ka hyrë në transaksion ose ka lëshuar urdhrin për tregti, vërteton se arsyet e tij për ta bërë këtë janë të ligjshme dhe se transaksioni ose urdhri për tregëtim përputhet për praktikën e pranuarë të tregut në tregun e energjisë me shumicë në fjalë; ose

iii. përdorimi i një mjeti (mekanizmi) fiktiv ose ndonjë forme tjetër mashtrimi ose mjeti që jep, apo mund të japë, sinjale false ose mashtruese në lidhje me furnizimin, kërkesën ose çmimin e produkteve të energjisë me shumicë; ose

1.5.2. shpërndarjen e informacionit përmes mediave, duke përfshirë internetin ose me ndonjë mjet tjetër me qëllim të dhënies së sinjaleve false ose mashtruese në lidhje me furnizimin, kërkesën ose çmimin e produkteve të energjisë me shumicë;

1.6. **Produkte të energjisë me shumicë** - nënkupton kontratat dhe dokumentet që janë derivat i tyre, pavarësisht se ku dhe si tregtohen:

1.6.1. kontratat për furnizimin me energji elektrike ose gaz natyror, kur dërgesa është në Shqipëri;

1.6.2. kontratat që lidhen me transmetimin/transportin e energjisë elektrike ose gazit natyror në Shqipëri ;

1.7. **Kontratat për furnizimin dhe shpërndarjen e energjisë elektrike ose gazit natyror për shfrytëzim nga konsumatorët fundor** - nuk janë produkte të energjisë me shumicë. Megjithatë, kontratat për furnizimin dhe shpërndarjen e energjisë elektrike ose

të gazit natyror tek konsumatorët fundor me një kapacitet konsumi më të madh se pragu i përcaktuar në pikën 1.8, do të trajtohen si produkte energjie me shumicë.

- 1.8. **Kapaciteti i konsumit** - nënkupton konsumin e konsumatorit fundor të energjisë elektrike ose të gazit natyror në shfrytëzim të plotë të kapacitetit të atij konsumatori. Ai përfshin të gjithë konsumin nga ai konsumator si një njësi ekonomike e vetme, për aq sa konsumi bëhet në tregjet me çmime të ndërlidhura me shumicë.

Për qëllime të përkufizimit në pikën 1.7 të këtij Neni, konsumi në impiantet individuale nën kontrollin e një njësie ekonomike të vetme që ka një kapacitet konsumi më të vogël se 50 GWh në vit, nuk do të merret parasysh, nëse këto impiante nuk ushtrojnë ndikim të përbashkët në çmimet e tregut të energjisë me shumicë për shkak të vendosjes së tyre në tregje të ndryshme përkatëse gjeografike;

- 1.9. **Sektori i energjisë** - aktivitete të cilat përfshijnë prodhimin, transmetimin, shpërndarjen, transportin, depozitimin, shitjen, rishitjen, blerjen dhe furnizimin e energjisë;
- 1.10. **Treg i energjisë me shumicë** - nënkupton tregun brenda Shqipërisë në të cilin tregtohen produkte të energjisë me shumicë;
- 1.11. **Pjesëmarrës i tregut** - nënkupton çdo person fizik apo juridik, duke përfshirë operatorët e sistemit të transmetimit dhe të shpërndarjes, i cili hyn në transaksione, duke përfshirë vendosjen e urdhrave për tregti, në një ose më shumë tregje të energjisë me shumicë;
- 1.12. **Person** - nënkupton çdo person fizik ose juridik;
- 1.13. **Enti Rregullator i Energjisë ose “ERE”** është autoriteti rregullator i sektorit të energjisë elektrike dhe gazit natyror, i cili ushtron aktivitetin në përputhje me ligjin 43/2015 Për Sektorin e Energjisë Elektrike, i ndryshuar dhe ligjin 102/2015 Për Sektorin e Gazit Natyror, i ndryshuar.
- 1.14. **Autoritet Publik** - çdo institucion publik, ku përfshihen autoritet ekzekutiv qeveritar, ministri, organ publik, departament, agjenci, ose autoritete të tjera të ngjashme që ushtrojnë kompetenca ekzekutive, ligjdhënëse, rregullative, administrative ose gjyqësore në territorin e Shqipërisë;
- 1.15. **Operator i Sistemit të Transmetimit** - personi fizik, ose juridik përgjegjës për operimin, mirëmbajtjen, zhvillimin e rrjetit të transmetimit në një zonë të caktuar, duke përfshirë interkoneksionet me sistemet e tjera ndërkufitare, dhe për të garantuar aftësinë afatgjatë të sistemit për plotësimin e kërkesave të arsyeshme për transmetimin e energjisë elektrike;
- 1.16. **Ndërmarrje** - çdo aktivitet biznesi pavarësisht mënyrës së organizimit ose formës së menaxhimit, ndërmarrje publike e themeluar për kryerjen e aktiviteteve për interes publik si dhe çdo person tjetër fizik ose juridik apo autoritet shtetëror që kryen aktivitet ekonomik;

- 1.17. **Ndërmarrje e lidhur** - nënkupton një filial ose një ndërmarrje tjetër në të cilën mbahet një pjesëmarrje ose një sipërmarrje e lidhur me një sipërmarrje tjetër;
- 1.18. **Operatori i Sistemit të Transmetimit të gazit natyror** – peson juridik të licencuar nga sipas dispozitave të ligjit, i cili kryen funksionin e transmetimit dhe që është përgjegjës për operimin, mirëmbajtjen, zhvillimin e sistemit të transmetimit në një zonë të caktuar, përfshirë edhe interkoneksionet e mundshme me sistemet tjera, dhe për garantimin e aftësisë afatgjate të sistemit për të plotësuar kërkesë për transmetimin e gazit natyror;
- 1.19. **Shpërndarja e gazit natyror** - kryhet nga operatorë të sistemit të shpërndarjes, të cilët janë persona juridikë, të licencuar, sipas dispozitave të ligjit i cili realizon funksionet e shpërndarjes dhe është përgjegjës për operimin, mirëmbajtjen dhe sipas nevojës, zhvillimin e sistemit të shpërndarjes, në një zonë të caktuar për garantimin e aftësinë afatgjate të sistemit për të plotësuar kërkesën për shpërndarjen e gazit natyror;
- 1.20. **Shpërndarja e energjisë elektrike** - kryhet nga operatori i sistemit të shpërndarjes person juridik, të licencuar, sipas dispozitave të ligjit, përgjegjës për operimin, mirëmbajtjen dhe, sipas nevojës, zhvillimin e sistemit të shpërndarjes në një zonë të caktuar, për sigurimin e aftësisë afatgjate të sistemit për të mbuluar kërkesat e arsyeshme për shpërndarjen e energjisë elektrike;
- 1.21. **Pozitë Dominuese** - pozita e një ose më shumë ndërmarrjeve, që i lejon ato të jenë të afta të veprojnë, për sa i takon ofertës ose kërkesës, në mënyrë të pavarur nga pjesëmarrësit e tjerë në treg si: konkurrentët, klientët ose konsumatorët;
- 1.22. **Infrastrukturë kritike** - nënkupton një aset, sistem ose pjesë të saj të domosdoshme për mirëmbajtjen e funksioneve jetike dhe sociale, shëndetin, sigurinë, mirëqenies ekonomike ose sociale të njerëzve, dhe çrregullimi ose shkatërrimi i së cilës do të kishte një ndikim të konsiderueshëm në Republikën e Shqipërisë ose në ndonjë Palë Kontraktuese si rezultat i mos mbajtjes së këtyre funksioneve.
- 1.23. **Informacion i ndjeshëm i lidhur me mbrojtjen e infrastrukturës kritike** - do të thotë informacion ose faktet në lidhje me një infrastrukturë kritike, i cili nëse zbulohet mund të shfrytëzohet me qëllim për të shkaktuar çrregullimin apo shkatërrimin e instalimeve në infrastrukturën kritike;
- 1.24. **Informacion konfidencial** – do të thotë të dhëna, dokumente apo informacione të tjera, komerciale apo teknike, që kanë të bëjnë me dizajnin, rehabilitimin, sigurinë, operimin, mirëmbajtjen dhe financimin e aktiviteteve të energjisë që nuk janë më në sektorin publik dhe që shpallja e tyre mund t'i vë në rrezik interesat komerciale të subjektit fizik apo juridik;
- 1.25. **Palët Kontraktuese** – do të thotë Palët Kontraktuese sipas Traktatit të Komunitetit të Energjisë.

KREU II

NDALIMI I TREGTIMIT DHE DETYRIMI PËR PUBLIKIM TË TË DHËNAVE

Neni 3

Ndalimi i tregtimit nga personat e brendshëm

1. Personat që kanë informacion të brendshëm në lidhje me një produkt të energjisë me shumicë, e kanë të ndaluar që të:
 - 1.1. përdorin këtë informacion për të përvetësuar ose disponuar, apo përpiqen për të përvetësuar ose disponuar, për llogari të tyre ose për llogari të një pale të tretë, direkt ose indirekt, produktet e energjisë me shumicë të cilave u referohet ky informacion;
 - 1.2. zbulojnë këtë informacion te çdo person tjetër përveç rasteve kur zbulimi i tillë bëhet në rrjedhën normale të ushtrimit të punës, profesionit ose detyrave të tyre;
 - 1.3. rekomandojnë ose nxisin një person tjetër, në bazë të informacionit të brendshëm, që të blejë ose të siguroj produktet e energjisë me shumicë me të cilat ai informacion është i lidhur.
2. Ndalimi i përcaktuar në paragrafin 1 zbatohet për personat e mëposhtëm që posedojnë informacion të brendshëm në lidhje me një produkt të energjisë me shumicë, antarët e organeve administrative, drejtuese ose mbikëqyrëse të një ndërmarrjeje:
 - 2.2. personat me zotërimi në kapitalin e ndërmarrjes;
 - 2.3. personat që kanë qasje në informata nëpërmjet ushtrimit të punës, profesionit ose detyrave të tyre;
 - 2.4. personat që kanë fituar informacion të tillë nëpërmjet veprimtarisë kriminale;
 - 2.5. personat që e dinë, ose duhet ta dinë, se është informacion i brendshëm.
3. Pikat 1.1 dhe 1.3 të paragrafit 1 të këtij Neni nuk zbatohen për operatorët e sistemit të transmetimit kur blejnë energji elektrike ose gaz natyror për të siguruar funksionimin dhe operimin e sigurt të sistemit.
4. Ky nen nuk zbatohet për:
 - 4.1 transaksionet e përfunduara gjatë kryerjes së një detyrimi që është bërë për shkak të blerjes ose shitjes së produkteve të energjisë me shumicë kur ky detyrim vjen si pasojë e një marrëveshjeje të lidhur, ose një urdhër për tregtimin, i vendosur përpara se personi në fjalë të ketë në posedim informacione të brendshme;
 - 4.2 transaksionet e lidhura nga prodhuesit e energjisë elektrike dhe të gazit natyror, operatorët e depozitimit të gazit natyror ose operatorët e importit të GNL-së, qëllimi i vetëm i të cilit është mbulimi i humbjes së menjëhershme fizike që rezulton nga ndërprerjet e paplanifikuara, ku mosndërmarrja e një veprimi të tillë do të ndikonte që pjesëmarrësi i tregut të mos jetë në gjendje të përmbushë detyrimet kontraktuale

ekzistuese ose kur veprimi i tillë është ndërmarrë në marrëveshje me operatorin e sistemit të transmetimit në fjalë për të siguruar funksionimin e sigurt të sistemit. Në një situatë të tillë, informacioni përkatës në lidhje me transaksionet duhet të raportohet në ERE. Ky detyrim i raportimit nuk do të cenojë detyrimin e përcaktuar në nenin 4 paragrafi 1;

4.3 pjesëmarrësit e tregut që veprojnë sipas rregullave të emergjencave kombëtare, ku autoritetet ligjore kanë ndërhyrë për të siguruar furnizimin me energji elektrike ose gaz natyror dhe mekanizmat e tregut janë pezulluar në një Palë Kontraktuese ose pjesë të tyre. Në këtë rast, autoriteti kompetent për planifikimin emergjencave duhet të sigurojë publikimin në përputhje me nenin 4 të kësaj Rregullore.

5. Kur personi i cili posedon informacion të brendshëm në lidhje me një produkt të energjisë me shumicë është një person juridik, ndalimet e parashikuara në paragrafin 1 të këtij Neni do të zbatohen gjithashtu për personat fizik që marrin pjesë në vendimin për të kryer transaksionin për llogari të personit juridik në fjalë.
6. Kur informacioni shpërndahet për qëllime mediatike ose shprehje artistike, shpërndarja e informacionit do të vlerësohet duke marrë parasysh rregullat që rregullojnë lirinë e shtypit dhe lirinë e shprehjes në media të tjera, përveç nëse:

6.1 këta persona kanë, drejtpërdrejt ose tërthorazi ndonjë avantazh ose përfitim nga shpërndarja e informacionit në fjalë; ose

6.2 zbulimi ose shpërndarja bëhet me qëllim të çrregullimit të tregut në lidhje me furnizimin, kërkesën ose çmimin e produkteve të energjisë me shumicë.

Neni 4

Detyrimi për të publikuar informacionin e brendshëm

1. Pjesëmarrësit e tregut duhet të publikojnë në mënyrë efektive dhe në kohë informacionin që ata posedojnë në lidhje me biznesin ose ndërmarrjet të cilat pjesëmarrësi i tregut në fjalë, ndërmarrja e tij mëmë ose ndërmarrja e lidhur, zotëron ose kontrollon, ose për çështjet operationale për të cilat pjesëmarrësi në treg ose ndërmarrja është përgjegjëse, qoftë tërësisht ose pjesërisht. Shpalosja e tillë do të përfshijë informacione relevante për kapacitetin dhe përdorimin e ndërmarrjeve për prodhimin, magazinimin, konsumin ose transmetimin e energjisë elektrike ose të gazit natyror, ose në lidhje me kapacitetin dhe përdorimin e ndërmarrjeve të GNL-së, duke përfshirë gadishmërinë e planifikuar ose të paplanifikuar të këtyre ndërmarrjeve.
2. Një pjesëmarrës tregu mund të vonojë, nën përgjegjësinë e vet, berjen publike të informacionit të brendshëm, në mënyrë që të mos paragjykojë interesat e tij të ligjshme, me kusht që veprimi i tillë të mos mashtrojë publikun dhe me kusht që pjesëmarrësi i tregut të jetë në gjendje të sigurojë konfidencialitetin e atij informacioni dhe të mos marrë vendime në lidhje me tregtimin e produkteve të energjisë me shumicë bazuar në atë informacion. Në një situatë të tillë,

pjesëmarrësi i tregut pa shtyrje të mëtejshme do të sigurojë publikimin e informacionit, së bashku me arsyetimin për vonesën e publikimit të tij te ERE.

3. Kurdo që një pjesëmarrës tregu ose një person i punësuar ose që vepron në emër të një pjesëmarrësi të tregut, zbulon informacionin në lidhje me një produkt energjie me shumicë gjatë ushtrimit të zakonshëm të profesionit ose detyrave të tij, siç referohet në pikën 2 të Nenit 3 (1), pjesëmarrësi i tregut ose personi duhet të bëjë zbulimin e menjëhershëm, të plotë dhe efektiv të atij informacioni te publiku. Në rast të një zbulimi jo të qëllimshëm, pjesëmarrësi i tregut duhet të sigurojë publikimin e plotë dhe efektiv të informacionit sa më shpejt që të jetë e mundur pas zbulimit jo të qëllimshëm. Ky paragraf nuk do të zbatohet nëse personi që merr informacion ka detyrimin e fshehtësisë, pavarësisht nëse detyrimi i tillë rrjedh nga ligji, rregulloret, statuti i shoqatës ose ndonjë kontratë.
4. Publikimi i informacionit të brendshëm, duke përfshirë formën e përmbledhur, në përputhje me, Ligjin për Sektorin e Energjisë Elektrike si dhe Ligjin për Sektorin e Gazit Natyror ose udhëzimet dhe kodet e rrjetit të miratuara në përputhje me Rregulloren në fuqi, nënkupton publikim të menjëhershëm, të plotë dhe efektiv.
5. Paragrafët 1 dhe 2 nuk cenojnë detyrimet e pjesëmarrësve të tregut sipas, Ligjin 43/2015 për “Sektorin e Energjisë Elektrike, te ndryshar si dhe Ligjin 102/2015 për “Sektorin e Gazit Natyror”, i ndryshuar përfshirë udhëzimet dhe kodet e rrjetit të miratuara në përputhje me këto ligje dhe rregulla, veçanërisht në lidhje me kohën dhe mënyrën e publikimit të informacionit.
6. Paragrafët 1 dhe 2 nuk cenojnë të drejtën e pjesëmarrësve të tregut për të vonuar zbulimin e informacionit të ndjeshëm në lidhje me mbrojtjen e infrastrukturës kritike dhe vlerësimin e nevojës për të përmirësuar mbrojtjen e tyre, nëse është e klasifikuar sipas legjislacionit në fuqi.
7. Jo më vonë se 6 muaj pas hyrjes në fuqi të kësaj Rregullore, ERE do të miratojë dhe publikoj në faqen e saj elektronike rregullat që përcaktojnë:
 - 7.1. mënyrën, efektivitetin dhe afatin kohor për publikimin e informacionit brenda subjektit të paragrafit (1) të këtij neni;
 - 7.2. rastet që justifikojnë publikimin e vonuar në përputhje me paragrafin (2) të këtij neni, si dhe afatin kohor për, në këtë rast, rregullat e publikimit të zbatueshme;
 - 7.3. kërkesat dhe afatin kohor të zbatueshëm për publikim të njëkohshëm, të plotë dhe efektiv, siç përcaktohet në paragrafin (3) të këtij neni;

Neni 5

Ndalimi i Manipulimit të Tregut

Ndaloheq çdo angazhim ose përpjekje për t'u përfshirë në manipulimin e tregut të energjisë me shumicë.

KREU III

MONITORIMI DHE REGJISTRIMI I PJESËMARRËSVE NË TREG

Neni 6

Monitorimi i tregut

1. ERE do të monitorojë aktivitetin tregtar të produkteve të energjisë me shumicë për të zbuluar dhe parandaluar tregtinë bazuar në informacionin e brendshëm dhe manipulimin e tregut në vend.
2. ERE do të bashkëpunojë në nivel rajonal nëpërmjet Bordit Rregullator të Komunitetit të Energjisë në kryerjen e monitorimit të tregjeve të energjisë me shumicë të referuara në paragrafin 1 të këtij Neni.
3. Për monitorim të tregut të energjisë me shumicë, ERE duhet të bashkëpunojë me Autoritetin Shqiptar të Konkurrencës, apo ndonjë organ tjetër të ngarkuar nga ligji për monitorimin e tregut. Në kryerjen e monitorimit të tregut, Autoriteti Shqiptar i Konkurrencës ose organi i monitorimit të tregut do të kenë të njëjtat të drejta dhe detyrime si ERE në zbatim të pjesës së parë të këtij paragrafi, fjalia e dytë e nenit 4 paragrafi 2 dhe nenit 13. ERE, jo më vonë se data 30 qershor i çdo viti, duhet t'i dërgoj Sekretariatit një raport për aktivitetet e vitit paraprak sipas kësaj Rregullore, dhe gjithashtu ky raport duhet të publikohet në faqen elektronike të ERE-së.
4. Jo më vonë se 6 muaj pas hyrjes në fuqi të kësaj Rregullore, ERE do të hyjë në marrëveshje me autoritetet përkatëse kombëtare për kryerjen dhe përcaktimin e procedurave për ekzekutimin e përgjegjësisë që i nënshtrohen këtij neni. Marrëveshje të tilla do të publikohen në faqen zyrtare të ERE-së.

Neni 7

Regjistrimi i pjesëmarrësve të tregut

1. Pjesëmarrësit e tregut që hyjnë në transaksione me produkte të energjisë me shumicë në Shqipëri, ose shprehin interesin për të hyrë në transaksione të tilla përmes procedurave të tregtimit, duhet të regjistrohen pranë ERE-së. Për qëllime të regjistrimit, ne shtojcën A është paraqitur forma për regjistrimit e hartuar nga Bordi i Rregullatorëve të Komunitetit të Energjisë dhe do ta publikoj në faqen zyrtare elektronike.
2. Regjistrimi i pjesëmarrësve të tregut është pa paragjykim ndaj detyrimeve për të përmbushur rregullat e aplikueshme të tregtimit dhe balancimit.
3. Jo më vonë se gjashtë (6) muaj nga afati i aprovimit të kësaj Rregulloreje, ERE do të krijojë regjistra të pjesëmarrësve të tregut në nivel kombëtar, të cilët do t'i mbajnë të përditësuar. Regjistri duhet t'i japë secilit pjesëmarrës të tregut një numër identifikues unik dhe duhet të përmbajë informacion të mjaftueshëm për të identifikuar pjesëmarrësin e tregut, duke përfshirë detajet përkatëse në lidhje me numrin e regjistrimit të subjektit në administratën tatimore (NIPT), vendin e themelimit, personat përgjegjës për vendimet operacionale dhe tregtare dhe

kontrolluesin ose përfituesin fundor të aktiviteteve tregtare të pjesëmarrësit të tregut. Regjistri i pjesëmarrësve të tregut do jetë publik.

4. ERE do t'ia prezantojë Bordit Rregullator të Komunitetit të Energjisë informacion nga regjistri i vet kombëtar.
5. Pjesëmarrësit e tregut nga paragrafi 1 i këtij neni, do të dorëzojnë formularin e regjistrimit të ERE përpara se të hyjnë në një transaksion me produktet e energjisë me shumicë.
6. Pjesëmarrësit e tregut të përmendur në paragrafin 1, do të komunikojnë menjëherë te ERE çdo ndryshim që ka ndodhur në lidhje me informatat e dhëna në formularin e regjistrimit.

KREU IV

INFORMACIONET KONFIDENCIALE

Neni 8

Mbrojtja e të dhënave

Kjo Rregullore nuk do të cenoj detyrimet e ERE-së për të ruajtur konfidencialitetin e informacionit të ndjeshëm tregtar, ashtu siç është përcaktuar me Ligjin për Mbrojtjen e të dhënave Personale (Ligji Nr. 9887 datë 10.3.2008).

Neni 9

Besueshmëria Operacionale

1. ERE duhet të sigurojë konfidencialitetin, integritetin dhe mbrojtjen e informacionit të marrë në përputhje me Nenin 4 dhe Nenin 6 të kësaj Rregullore. ERE duhet të marri të gjitha masat e nevojshme për të parandaluar çdo keqpërdorim dhe qasje të paautorizuar në informacionin e mbajtur në sistemin e saj. ERE, autoriteti kombëtar i konkurrencës dhe autoritetet e tjera përkatëse duhet të sigurojnë konfidencialitetin, integritetin dhe mbrojtjen e informacionit që ata marrin në përputhje me Nenin 4 dhe Nenin 6 të kësaj Rregullore, dhe duhet të ndërmarrin hapa për të parandaluar keqpërdorimin e një informacioni të tillë.
2. ERE mund të vendosë të publikojë pjesë të informacionit që posedon, me kusht që informacioni i ndjeshëm tregtar për pjesëmarrësit individual të tregut, ose transaksionet individuale ose vendet e veçanta të tregut të mos zbulohen dhe mos të nxirren përfundime.
3. ERE duhet të vë në dispozicion bazën e të dhënave tregtare komercialisht jo të ndjeshme për qëllime shkencore, në përputhje me kërkesat e konfidencialitetit.

Neni 10

Detyrimet e personave që profesionalisht rregullojnë transaksionet

1. Çdo person që profesionalisht rregullon transaksionet për produktet e energjisë me shumicë që dyshon në mënyrë të arsyeshme se transaksioni mund të shkelin Nenin 3 dhe Nenin 5, do të njoftojë ERE-në pa vonesa të mëtejshme.
2. Personat që rregullojnë profesionalisht transaksionet në produktet të energjisë me shumicë, duhet të krijojnë dhe mbajnë rregulla dhe procedura efektive për të identifikuar shkeljet e percaktuara me Nenin 3 dhe Nenin 5 të kësaj Rregullore.

Neni 11

Bashkëpunimi në nivel të Komunitetit të Energjisë dhe në nivel kombëtar

1. ERE do të bashkëpunojë me rregullatorët e energjisë të palëve kontraktuese në kuadër të komunitetit të energjisë, duke përfshirë bashkëpunimin në nivel rajonal nëpërmjet Bordit Rregullator të Komunitetit të Energjisë për qëllimet e kryerjes së detyrave të tyre në përputhje me këtë Rregullore.
2. ERE, Autoriteti Shqiptar i Konkurrencës dhe autoritetet tjera kompetente, mund të krijojnë forma të përshtatshme të bashkëpunimit për të siguruar hetime efektive dhe efikase për të kontribuar në një qasje koherente dhe të qëndrueshme ndaj hetimeve, procedurave gjyqësore dhe zbatimit të kësaj rregulloreje dhe ligjet përkatëse financiare dhe të konkurrencës.
3. ERE pa vonesë do të informojnë Bordin Rregullator të Komunitetit të Energjisë dhe Sekretariatit të Komunitetit të Energjisë në mënyrë sa më specifike, kur ka bazë të arsyeshme për të dyshuar se veprimet në shkelje të kësaj Rregullore janë duke u kryer ose janë kryer brenda vendit ose nga një Palë tjetër Kontraktuese.
4. Kur ERE dyshon se aktet që kryhen në një Palë Kontraktuese tjetër janë duke ndikuar në tregjet ose çmimet e produkteve të energjisë me shumicë në Shqipëri, atëherë mund të kërkojë nga Bordi Rregullator i Komunitetit të Energjisë dhe Sekretariati i Komunitetit të Energjisë të sigurojnë që kërkesat e rregullores REMIT të zbatohen në atë Palë Kontraktuese.
5. Për të siguruar një qasje të koordinuar dhe të qëndrueshme ndaj abuzimit të tregut të energjisë me shumicë, ERE do të informojë Autoritetin Shqiptar të Konkurrencës, Sekretariatit dhe Bordin Rregullativ të Komunitetit të Energjisë, kur ka bazë të arsyeshme për të dyshuar se ka akte që janë duke u kryer ose janë kryer në tregun e energjisë me shumicë, të cilat mund të përbëjnë shkelje të konkurrencës në vend apo tek Palët Kontraktuese.
6. Në kuadër të bashkëpunimit me Bordin Rregullator të Komunitetit të Energjisë, ERE :
 - 6.1 Do t'i sigurojë Bordit të Rregullatorit të Komunitetit të Energjisë çdo informacion në lidhje me shkeljet e dyshuara, nëse kërkohet;

6.2 do të fillojë monitorim/hetim administrativ për shkeljen e dyshuar dhe të ndërmarrë veprimet e duhura për të korrigjuar çdo shkelje të gjetur;

6.3 do të koordinojë monitorimet/hetimet administrative rreth shkeljes së mundshme që ka pasur efekt ndërkufitar në përputhje me procedurat e Bordit Rregullator të Komunitetit të Energjisë.

7. Nëse ERE merr një kërkesë për informacion nga paragrafi 6 i këtij neni ose merr një kërkesë për fillimin e monitorimit/hetimit administrative të një shkeljeje të dyshuar, menjëherë duhet të marrë masat e nevojshme për të adresuar atë kërkesë. Nëse ERE nuk është në gjendje që menjëherë të japë informacionin e kërkuar, atëherë do ta njoftojë pa vonesë Bordin Rregullator të Komunitetit të Energjisë për arsyet e vonesës.

ERE mund të refuzojë të veprojë në një kërkesë për informacion kur:

- 7.1 pranueshmëria mund të ndikojë negativisht në sovranitetin ose sigurinë e vendit;
- 7.2 procedurat gjyqësore tashmë kanë filluar në lidhje me të njëjtat veprime dhe kundër personave të njëjtë të autoritetet vendore; ose
- 7.3 një gjykim final është dorëzuar në lidhje me personat e tillë për të njëjtat veprime në vend.

Në një rast të tillë, ERE njofton Bordin Rregullator të Komunitetit të Energjisë në përputhje me rrethanat, duke dhënë informacion sa më të detajuar për ato procedura ose gjykimin.

8. ERE do të marrë pjesë në një grup monitorimi/hetimi administrativ të koordinuar nga Bordi Rregullator i Komunitetit të Energjisë i thirrur në përputhje me paragrafin 6, duke dhënë të gjithë ndihmën e nevojshme.

Neni 12

Sekreti profesional

1. Çdo informacion konfidencial i pranuar, i shkëmbyer ose i transmetuar në pajtim me këtë Rregullore i nënshtrohet kushteve të sekretit profesional të përcaktuar me këtë Nen.
2. Detyrimi i fshehtësisë profesionale zbatohet për:
 - 2.1. personat që punojnë ose kanë punuar për ERE-në ose autoritetin tjetër, që është ose mund të jetë në posedim, ose që merr një informacion të tillë në përputhje me këtë rregull ose ndonjë proces hetimor;
 - 2.2. auditorët dhe ekspertët e informuar nga ERE dhe autoritetet tjera kompetente.
3. Informatat konfidenciale të pranuar nga personat e përmendur në paragrafin 2 të këtij Neni gjatë kryerjes së detyrave të tyre, nuk mund të zbulohen te ndonjë person apo autoritet tjetër, përveç në formë të përmbledhur në mënyrë që një pjesëmarrës tregu individual ose vendi i tregut nuk mund të identifikohet, përjashtuar rasteve të parashikuara në Kodin Penal, dispozitat e tjera të kësaj Rregullore ose legjislacionit tjetër relevant të Shqipërisë dhe Komunitetit të Energjisë.

4. Pa paragjykuar rastet e parashikuara nga Kodi Penal, ERE, organet ose personat të cilët marrin informacion konfidencial në mbështetje me këtë Rregullore, mund ta përdorin atë vetëm në kryerjen e detyrave të tyre dhe për ushtrimin e funksioneve të tyre. Autoritetet, organet ose personat e tjerë mund ta përdorin atë informacion për qëllimin për të cilin u është ofruar atyre ose në kontekstin e procedurave administrative ose gjyqësore që lidhen posaçërisht me ushtrimin e këtyre funksioneve.
5. Ky Nen, nuk do të pengojë ERE-në që të shkëmbejë ose të transmetojë, në përputhje me legjislacionin në fuqi, informacionin konfidencial, me kusht që ai të mos jetë pranuar nga një autoritet i një Pale tjetër Kontraktuese ose nga Bordi Rregullator i Komunitetit të Energjisë apo Sekretariatit të Komunitetit të Energjisë sipas kësaj Rregulloreje.

KREU V

MONITORIMI, HETIMI ADMINISTRATIV DHE MASAT ADMINISTRATIVE

Neni 13

Zbatimi i ndalimeve ndaj abuzimit të tregut

1. ERE do të sigurojë që të zbatohen ndalimet e përcaktuara në nenet 3, 5 dhe detyrimi i përcaktuar në nenin 4.
2. ERE, në përputhje me kompetencat e dhëna nga Ligji 43/2015 për “Sektorin e Energjisë Elektrike”, i ndryshuar si dhe Ligji 102/2015 për “Sektorin e Gazit Natyror”, i ndryshuar do të ndërmarrë masa për monitorimin, hetimin administrativ në lidhje me ndalimet dhe kërkesat sipas kësaj rregulloreje, e të cilat do të ushtrohen:

2.1 në mënyrë direkte;

2.2 në bashkëpunim me autoritetin e konkurrencës dhe autoritetet e tjera relevante; ose

2.3 me kërkesë të organeve gjyqësore dhe të prokurorisë.

Kur është e përshtatshme, ERE mund të ushtrojë kompetencat e veta monitoruese, te hetimit administrativ në bashkëpunim me tregjet e organizuara, sistemet e përputhjes së tregtimit (trade-matching system) ose persona të tjerë që rregullojnë profesionalisht transaksionet.

3. Veprimet monitoruese ose te hetimit administrativ të përcaktuara me paragrafin 1 do të përfshijnë të drejtën:
 - 3.1 për qasje në ndonjë dokument përkatës në çdo formë, dhe të marrin një kopje të saj;
 - 3.2 për të kërkuar ndonjë informacion nga çdo person përkatës, ata që përfshihen në mënyrë të vazhdueshme në komunikimin e urdhrave ose kryerjes së veprimeve në fjalë, përfshirë edhe eprorët e tyre, dhe nëse është e nevojshme, të drejtën për të thirrur dhe dëgjuar ndonjërin prej personave apo eprorët e tyre;
 - 3.3 për të kryer inspektime në vendndodhje;
 - 3.4 për të kërkuar regjistrimet ekzistuese telefonike dhe të komunikimeve elektronike;

- 3.5 për të kërkuar ndërprerjen e çdo praktike që është në kundërshtim me këtë Rregullore ose aktet e implementuara të miratuara në bazë të saj;
- 3.6 për të kërkuar nga gjykata për të ngrirë ose sekuestruar asetet deri në përfundimin e hetimit administrativ;
- 3.7 për të kërkuar nga gjykata ose ndonjë autoritet kompetent të vendosë ndalimin e përkohshëm të veprimtarisë.

Neni 14

Afatet për marrjen e vendimit dhe publikimi i tij

1. Vendimi për konstatimin e shkeljeve të mundshme dhe vendimin për konstatimin e keqpërdorimit dhe abuzimit të tregut me shumicë, ERE e merr me një afat prej gjashtëdhjetë (60) ditësh, nga dita e vërtetimit të të gjitha fakteve relevante për marrjen e një vendimi të tillë.
2. ERE në raste të veçanta mund ta zgjasë afatin për marrjen e vendimeve edhe për gjashtëdhjetë (60) ditë.
3. Të gjitha vendimet merren në mënyrë të pavarur nga cilido organ politik apo publik, apo çfardo ndërmarrje publike apo private.
4. Vendimet brenda tridhjetë (30) ditësh do të publikohen në faqen zyrtare të ERE-së.
5. Të dhënat të cilat konsiderohen sekret tregëtar do të përjashtohen nga publikimi sipas paragrafit 4 të këtij Neni.

Neni 15

E drejta e ankesës

1. Kundër vendimit të ERE-së, me të cilën konstatohet shkelja e kësaj Rregulloreje dhe shqiptimit të masave ndëshkuese si dhe vendimit me të cilin ndërpritet procedura për shkak të çështjeve paraprake, nuk është e lejuar ankesa, mirëpo pala e pa kënaqur në afat prej 30 ditësh, pas pranimit të vendimit mund të fillojë padi për konflikt administrativ në gjykatën kompetente në Republikën e Shqipërisë.
2. Fillimi i konfliktit administrativ nuk e ndalon ekzekutimin e vendimit.

Neni 16

Masat administrative dhe Gjobat

1. ERE në përputhje me Nenin 107 të Ligjit për Sektorin e Energjisë Elektrike, ashtu dhe Nenin 106 të Ligjit për Sektorin e Gazit Natyror dhe Rregulloren për Procedurat e Vendosijes dhe Reduktimit të Gjobave, do të ndërmerr masat ndëshkimore për shkeljet e kësaj Rregullore.
2. ERE mund të vendos masa administrative si në vijim:

- 2.1. Të detyrojë personin fizik dhe juridik që të ndërpresë kryerjen e aktiviteteve që shkaktojnë shkelje sipas kësaj Rregullore;
 - 2.2. Të shpall të pavlefshëm çdo akt ose vendim që përbën shkelje, të anullojë dhe të shfuqizojë atë;
 - 2.3. Të detyrojë personat fizik dhe juridik që të kryejnë të gjitha veprimet e arsyeshme që konsiderohen si të nevojshme për të eliminuar efektet negative, dhe shqiptimin e vërejtjeve;
 - 2.4. Të përcaktoj masa të përkohshme në lidhje me shkeljen e supozuar.
3. Pavarësisht masave administrative të përcaktuara me këtë Rregullore, ERE mund të vendosë edhe gjoba për personat fizik dhe juridik për shkeljet në përputhje me Nenin 107 të Ligjit 43/2015 “Per Sektorin e Energjisë Elektrike”, i ndryshuar ashtu dhe Nenin 106 të Ligjit 102/2015 për “Sektorin e Gazit Natyror”, i ndryshuar si në vijim:
 - 3.1. Nuk jep informata të kërkuara sipas kësaj Rregulloreje;
 - 3.2. Zbulon informata konfidenciale në mënyrë të papranueshme;
 - 3.3. Nuk jep ndihmën e kërkuar dhe nuk pranon të bashkëpunojë me organet kompetente;
 - 3.4. Nuk vepron në pajtim me masat e vendosura për të parandaluar keqpërdorimin e pozitës dominuese;
 - 3.5. Mban llogari që nuk është në përputhje me kërkesat e legjislacionit në fuqi;
 - 3.6. Vepron në kundërshtim me këtë Rregullore dhe Legjislacionin në fuqi.
 4. Për shkeljet e përcaktuara në paragrafin 3 të këtij Neni, personit fizik dhe juridik do t’i shqiptohen gjoba nga (500 000 Leke) deri në kufirin ligjor të përcaktuar në ligjet e përmendura në piken 3 të këtij neni.
 5. Niveli i gjobës sipas paragrafit 4 të këtij Neni, do të varet nga faktorët si në vijim:
 - 5.1. Vlera materiale e dëmit të shkaktuar;
 - 5.2. Numri i konsumatorëve të prekur;
 - 5.3. Përfitimet financiare nga veprimet e paligjshme të ndërmarra; dhe
 - 5.4. Ndikimi i shkeljes në funksionin e tregut të energjisë.
 6. Gjatë shqiptimit të masës administrative dhe gjobës, ERE do të njoftojë me shkrim personat fizik dhe juridik për shkeljet e bëra dhe do t’iu jap mundësi dhe kohë që të përgjigjen me shkrim, brenda katërmëdhjetë (14) ditësh nga njoftimi.
 7. ERE pas pranimit të përgjigjeve me shkrim nga personat fizik dhe juridik do të vlerësojë ato dhe do të nxjerr vendimin në përputhje me konstatimet dhe shkeljet e vërtetuara.
 8. Nëse gjoba e vendosur nga ERE nuk paguhet brenda afatit të përcaktuar ligjor, do të fillohet procedura gjyqësore për pagesë të gjobës si borxh civil.

9. Masat administrative dhe gjobat e vendosura nga ana e ERE-së, nuk përjashtojnë përgjegjësinë civile dhe përgjegjësinë penale sipas legjislacionit në fuqi.
10. ERE do ti bëj publike masat ose gjobat e vendosura sipas paragrafit 1 për shkelje të kësaj Rregulloreje, përveç rastit nëse zbulimi i tillë do të shkaktonte dëme joproporcionale për palët e përfshira.
11. Të gjitha gjobat e mbledhura sipas këtij Neni do të paguhen në Buxhetin e Republikës së Shqipërisë.

KREU VI

DISPOZITAT PËRFUNDIMTARE

Neni 17

Ndryshimet

1. ERE ka të drejtën që të ndryshoj ose ta modifikoj çdo dispozitë të kësaj Rregullore.
2. Pjese perberse e kësaj rregullore është dhe Shtojca A, bashkelidhur.
3. Procedurat për ndryshimin ose modifikimin e kësaj Rregulloreje do të jenë të njëjta bazuar në rregulloren e ERE për kete ceshtje.

Neni 18

Interpretimi

Në rast se ka paqartësi për dispozitat e kësaj rregulloreje, ERE mund të nxjerrë informacione shpjeguese.

Neni 19

Hyrja në fuqi

Kjo Rregullore hyn në fuqi në datën e miratimit nga Bordi i ERE-së dhe publikohet në faqen zyrtare elektronike të ERE-së.